

北京圖書館 編

北京圖書館藏珍本
年譜
叢刊



第 42 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 42 冊



第四十二冊目錄

王恭襄公年譜	一
邵文莊公年譜	二八五
粵洲公年譜	四五七
陽明先生年譜	四六九

王恭襄公年譜序

有明一代決大疑定大難爲重臣者曰于忠肅曰王恭襄曰張文忠夫忠肅文忠南人也事功旣彰標榜尤習讀史者類重其人若恭襄則吾晉人也吾晉且以理學時文相尙標榜之說夙所未聞今即恭襄故里之太原縣求恭襄遺著猶感百無二三存焉况復求知人論世綜其經歷分年纂輯使讀者瞭然於公所處之艱所就者大以徵文以考獻而責諸迷溺於理學時文之區殆幾於不可必得乎太原王君景文公裔孫也固有志光迪前烈者頃屬張生逸蓬輯公年譜將以印行編竟示愚讀訖

作而言曰嗚呼是非第王氏之光抑亦吾晉後死之重責耳編輯去取均有據依旁證可資并爲詳悉而且援據原書明標所出及亟欲考核諸書編末附存噫是尤可謂善讀書而不苟作者已顧或謂恭襄顯宦在正德時其晰邊情任陽明信有可稱者然武宗童昏曾無諫諍宦寺驕縱未加制裁是猶未洽人意歟豈知社稷之臣以安社稷爲悅苟利國家奚恤他故忠肅何以不諫易儲文忠何以不諫奉佛皆無害其爲重臣何獨於恭襄而苛求耶又謂恭襄之媚伎如排彭濟物陳禹學軋楊介夫此亦不理於人口者豈知賞功罰罪治世微權三公事蹟史冊

可攷即忠肅斥石亨徐有貞文忠傾高拱皆以重其大節而寬其過乃獨斷斷於恭襄詎公論耶又謂恭襄之嚙錢寧亦貽時口實豈知投鼠忌器古有明徵金英何爲力贊忠肅馮保何爲同情文忠亦有事實且彼時璫餼熏天若恃氣與抗則東林之禍不必俟天啓朝也況陽明固理學名臣其平宸濠之奏必借張永谷大用乃得批行陽明何以不加貶損而獨集矢於恭襄耶嗟夫宋明以來門戶黨起黨同伐異習以爲常仕宦之途尤多機詐盡是非之無正也久矣然熊芝之問彼遂猶呼晉溪而大慟是仰公道不泯於人間乎不然恭襄之歿墓木且拱矣何以

芝岡致感如是之深哉而吾晉則向鮮文華復深樸儉即太原
僅有李鳳石先生辯議而修志者且從漢置又何怪非太原人
耶愚於生此輯略加核正字句又欲乞代語景文恭襄遺著四
庫僅存誠能於北平圖書館遙錄或假印如前年盧靖氏曾經
假影數種在湖北先哲遺書有先例也是吾晉文獻攸存尤王
氏繼志述事之大者乎愚重幸恭襄年譜之成而猶冀恭襄他
著行於世故不辭喋喋爲詞胡敢云序也

中華民國二十一年陬月榆次常贊春譔

王恭襄公年譜序

自宋太宗太平興國中滅北漢墮晉陽城而山西之武功文化爲之驟衰宋世待遇山西人亦甚落漠文有畢世安文彥博趙鼎數人武則狄青一人而已楊業降將耳不蒙委重而一代元臣如司馬光者隸籍陝西軍當時涑水尙不屬山西也金元文化稍振然多在草野無可論者明世晉陽故墟乃有王恭襄公其人者起焉早歲以文章擅大名當時所謂河東三鳳者恭襄實爲其魁中年以還揚歷中外久握本兵重任天下之安危係之武功赫濯出於儒生自于忠肅以後未有其比也嗚呼豈非

表裏山河靈秀之氣久遏抑無所渫乃鍾育於一人哉明世論才臣者曰三王驥也越也皆非恭襄之比也論者猶推稱其功勛而不計其小德之出入況恭襄經緯方略動關一代之存亡乎吾晉名賢守正有餘往往短於權變文潞公稍以挾術任數見疑於宋世小儒而貝州之功昭昭在人耳目此非可以僥倖得之也恭襄公開濟之才幾幾駕潞公而上之徒以生平頗仗術數而與之爲黨仇爭怨如楊廷和彭澤諸公者又皆卓焉一代名臣是以毀譽無定蹄尾紛然溢於當時簡牘要之皆不足一辨者也莊生不云乎吹萬不同使其自己是非恩怨之言曾

何足以撓千秋定論哉封疆危日方見才難明季傷心人所以致慨于張江陵也空言譁爭以後息者爲勝此自宋明理學家習氣劍首一映何足以爲輕重耶象升屢遊晉祠訪恭襄遺廟徘徊久之欲問前朝文獻而父老無能道者今乃得恭襄賢裔景文與張逸蓬君所訂年譜讀之駭目驚心以爲眞年譜中之大觀也昔人創爲年譜意在使鉅公名流生平詩文得所經緯耳有達人焉沿襲其體而擴張之入以國史參以辨說而其體遂爲一部鉅觀治史學者所不能廢也清代著述家補撰往代賢哲年譜無慮百數十種吾嘗張石舟所輯顧閣兩先生年譜

則其中之最有名者也余一再披尋亦不免小有疏誤如以南
河總督于成龍爲永寧籍諡清端者而不知此乃漢軍籍諡襄
勤者也今讀張君此譜寧有過於瑣碎周密者而絕少疏誤其
夾叙王陽明先生平濠戡擒之事尤詳此爲恭襄一生大節目
非廣已造大借姚江事業以爲晉溪增光也劉知幾謂作史必
擅才學識三長而識尤重觀譜中此一端可不謂之有識乎哉
刊而傳之不惟恭襄勛庸得以昭灼百世亦使晉陽故墟光氣
熊熊上燭霄漢來者有所勸而興焉五代以前之山西庶幾可
以復觀乎此則象升俯仰三千年之歷史感慨係焉者也

壬申五月晉城郭象升拜序

王恭襄公年譜

郭序

三
一齊
芳
堂

王恭襄公年譜序

明興獻王嘗言楚有三傑劉大夏李東陽楊一清也余亦云正嘉間晉有三傑三傑者陶恭介喬莊簡王恭襄三人負海內重望廷信以清白嚴以嚴而晉溪則善任智數矣史稱恭襄險伎公論尤不予恭襄與襄毅並有才略相中傷不已恭襄豈以是蒙譏乎蘭州不善處置哈密而陽明雍容談笑以平宸濠且其道德勛業照耀寰宇非一世之人乃百世之師恭襄任陽明而黜蘭州寧可謂無人倫鑒晉之有晉溪猶楚之有應寧抗心希古其才略俱不減姚崇矣余籍隸江夏與熊襄愍生同里稔聞

襄愍被逮猶呼晉溪而大慟爾時恭襄墓木且拱猶動襄愍之
慟念其沆瀣一氣可知余敬襄愍余亦敬恭襄茲張君逸蓬編
輯恭襄年譜索序于余余故排斥悠謬之論而爲之序云

中華民國二十一年夏月武昌張長損闡序

王恭襄公年譜序

余曩奉檄宰太原與張君逸蓬過從最密去歲逸蓬輯太原文
存余伏而讀之私謂太原人才學術莫尙於閭潛邱而勛業莫
高於王恭襄明史謂恭襄權譎之尤余謂如公者權而有合於
經譎而不失於正也方其時武宗單騎巡邊禮部議建儲居守
公曰斯議也古則有之我朝有祖訓在設援立非其人吾曹死
無惜也如祖訓何力拒其議此非權而有合於經乎武宗臨崩
駕駐通州江彬擁邊兵環衛勢極兇赫召九卿覲公即日詣通
州覲彬掠奪九卿印行大事公反佩印往與彬和同如魚水此

非譎而不失其正乎且更有進焉公之治漕也凡漕河里步近
遠開座丈尺漕舟木材之費考核畫一不爽毫釐不可謂非智
同臧仲也公之在獄也梁焯語霍韜曰宸濠反時朝士歸心濠
者十之七且曰濠必成事屹屹不懼惟公一人不可謂非勇高
賁育也以智若彼以勇若此既能守經又堪持正非名德而能
具此乎作史者乃云公險忮公論尤不予小人之好議論不樂
成人之美竟若是歟茲公之裔孫景文先生敬念先德慨然以
編輯公之年譜屬吾逸蓬逸蓬學甚博識甚超又能勤於搜討
勉應景文先生之請從事茲役又時就正吾師常子襄先生年